

Investigashon den un forma Apresiasi

Definicion di Investigacion den un forma Apresiasi (IA)

Investigacion den un forma Apresiasi (IA) ta un proceso participativo den cual e hende humano ta central y den e proceso aki tur hende cu ta biba na Aruba ta central. IA ta studia y explora kico ta duna bida (inspira y motiva) e hendenan bibando na Aruba. IA ta basa riba e suposicion cu cada sistema cu ta biba tin un nucleo bon/fuerte/positivo cu ta scondi y ta wordo subestima. Dor di trece pa dilanti e aspectonan bon/fuerte/positivo e ta crea un fuente duradero di energia positivo pa transformacion/cambio di e comunidad Arubano. IA ta involucra e buskeda di e aspectonan bon/fuerte/positivo di Aruba. E curazon y e estudio di IA ta wordo haci dor di haci preguntanan tocante e aspectonan bon/fuerte/positivo di e comunidad Arubano. Dor di esaki ta bin pa dilanti kico ta duna bida na e comunidad Arubano. Preguntanan ta wordo haci basa riba experiencia, kico un hende ta haña ta importante di un tópico y dicon y kico ta duna e Arubiano bida na Aruba. Tambe preguntanan lo wordo haci con e comunidad di Aruba ta visualisa e futuro di Aruba dor di usa su imaginacion y con e comunidad Arubano kier logra e Aruba cu e comunidad Arubano ta visualisa.

Etapanan di IA

IA tin cuater etapa, esta descubri, imagina/visualisa, diseña y destina. Cada etapa ta elabora pa e siguiente etapa di IA. Informacion obteni den cada etapa ta wordo usa pa e siguiente etapa. Den cada etapa mas y mas hende ta bira consciente di e proceso aki y ta forma parti di e proceso dor di participa y duna nan aporte na e proceso aki.

Etapa 1 Descubri

E etapa aki ta studia kico ta duna bida na nos Arubianonan ora nos ta sinti nos aprecia. Tambe ta wordo studia kico e comunidad Arubiano ta balora, kico nos Arubianonan a experiencia cu ta duna nan un sentimento positivo. Adicionalmente e origen di e aspectonan bon di Aruba lo wordo studia. Studia den e etapa aki kier men dor di haci pregunta.

Preguntanan lo wordo haci tocante na unda Aruba ta y dicon Aruba ta manera e ta awor. Arubianonan lo bai papia tocante kico nan ta kere y di unda tur esakinan a bin. Personanan cu wordo entrevista lo conta storia, mustra video, mustra portret, etc. For di esaki lo bin dilanti e aspectonan bon/fuerte/positivo di Aruba, con e comunidad ta experiencia esaki y e balor cu esaki tin pa nan.

Un par di ehempel di preguntanan cu lo wordo haci den e etapa aki ta:

- Kico pa bo ta un bon calidad di bida na Aruba? Kico bo a experiencia den bo bida na Aruba cu a pone bo sinti bon?
- Menciona algún aspecto di Aruba cu ta importante pa bo y dicon.

Etapa 2 Imagina/visualisa

Den e etapa aki lo studia con e comunidad Arubiano ta imagina y visualisa Aruba según e aspectonan cu nos Arubianonan ta haña importante. E aspectonan di importancia aki a wordu trece dilanti den e prome etapa di IA, esta e etapa di descubri. Preguntanan lo wordo haci tocante con nos Arubianonan ta imagina/visualisa e futuro di Aruba.

Un par di ehempel di preguntanan cu lo wordo haci den e etapa aki ta:

- Sera bo wowonan y bo ta lanta bek den aña 2025 despues di un soño largo. Bo ta lanta y bo ta core rond den bo auto na Aruba y bo ta wak cu Aruba ta manera semper bo a desea cu Aruba ta. Con Aruba ta? Con Aruba lo ta diferente cu awor aki?
- Imagina cu nos ta den 2025 y Aruba como isla a gana un premio internacional. Cua ta e premio internacional aki cu bo ta desea pa Aruba? Kico bo kier pa wordo bisa di Aruba ora cu e premio aki ta wordo entrega? Con esaki ta pone bo sinti y dicon?

Etapa 3 Diseña

Den e etapa aki lo traha riba e contesta di e pregunta ‘Con Aruba ta si e wordo diseña según e aspectonan bon/fuerte/positivo di Aruba y ta bira posibel un Aruba según e imagen/visualisacion di e comunidad Arubano?’

Den e etapa aki e comisionnan lo wordo instala. E miembronan di e comisionnan lo bin for di e etapa di describimento y imagina/visualisa, for di e seccionnan di e interviewnan cu lo wordo haci. E personanan aki a bin dilanti y kier ta involucra den e etapa aki di e proceso.

E comisionnan lo bai traha cu tur e informacion cu a haña a base di tur e entrevistanan cu a wordo ehecuta den e etapa di descubrimiento y imagina/visualisa. Ta bai traha riba e vision pa Aruba te cu 2025, strategianan, structura, practica cu a sali dilanti cu ta traha bon, cuadro institucional, etc.

Etapa 4 Destina

Den e etapa aki e miembronan di e diferente comisionnan lo wordo evalua, si mester mas hende pa traha den e comisionnan y con e comisionnan ta bayendo.

Lo traha riba e posibel accionnan, cooperacion y apoyo cu ta necesario (e cuadro institucional), etc. Lo usa e informacion di e etapa di diseña. Tur esakinan lo wordo integra den e plan nacional integral strategico. E plan aki lo wordo skirbi y lo wordo poni disponibel pa wordo consulta dor di e comunidad di Aruba.

Na final di e etapa di destina, lo tin un celebracion grandi pa festeha tur e logranan obteni durante tur etapa di IA.

